

Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE



Broj: 01-99/26
Vareš, 28.04. 2026. godine

Z A P I S N I K
sa 14. sjednice Općinskog vijeća Vareš,
održane 02.04. 2026. godine

Predsjedavajući OV Igor Šimić pozdravio je sve prisutne.

Prisutni vijećnici: Andrej Malbašić, Amela Mešić, Asim Balta, Asmir Čizmo, Dario Dodik, Dino Ahmedović, Dževad Mahmutović, Edin Ibrišimović, Igor Hinger, Igor Šimić, Nazif Hajrić, Nermin Hrvat, Nikola Šimić, Semir Memić, Srđan Franjić, Šaban Ibrišimović, Zdenko Franjić i Zdravko Barkić.

Odsutni: Denis Kovačević.

Predsjedavajući OV konstatira da Vijeće može raditi jer ima kvorum za rad sjednice.

Pored vijećnika sjednici prisustvuju: Malik Rizvanović, općinski načelnik; Mersad Đido, sekretar OV; Ermin Musa, pomoćnik načelnika; Ibrahim Spahić, pomoćnik načelnika; Mervana Hajrić, pomoćnik načelnika; Stela Terzić, šef Odsjeka za finansije i trezor; Belma Karamustafić, zamjenica općinskog pravobranilaštva; Leon Pavlović, predsjednik OIK-a; Šejla Mustaćević, komandir PS Vareš; Ivan Miletović, direktor JP „Vareš-stan“ d.o.o. Vareš i uposlenica preduzeća Elmedina Muftić; građani i predstavnici medija.

Predsjedavajući OV otvorio je 14. sjednicu s početkom u 14.00 sati u velikoj sali Općine Vareš.

Predsjedavajući OV Vareš je pozvao predsjednika OIK-a Leona Pavlovića da uruči certifikat Maliku Rizvanoviću – Načelniku Općine Vareš, kojem je CIK-a dodijelila mandat.

Mersad Đido, sekretar OV izvijestio je prisutne da je na 13. sjednici OV održanoj 27.02. i 04.03. 2026. godine, Vijeće donijelo tri (3) zaključka, dva (2) zaključka su realizovana a jedan (1) zaključak je toku realizacije. Postavljeno je pet (5) vijećničkih pitanja, na sva pitanja dat je odgovor pisanim putem. Dostavljen je jedan (1) odgovor na pitanje postavljeno na 12. sjednici.

Malik Rizvanović, općinski načelnik pod aktuelnim pitanjima izvijestio je prisutne da je 15.03. 2026. godine istekao Ugovor za subvencioniranje prevoza na relaciji Vareš-Zenica, zaključen između Općine Vareš i preduzeća Ljaljić Turs d.o.o. Čelić. Upoznao je prisutne o razlozima zbog kojih ugovor nije produžen. Općina Vareš radi na iznalaženju rješenja i mogućnosti da se osigura prevoz za građane. Održan je sastanak sa Centrotransom, a sve u cilju uspostavljanja linije za Zenicu. Izjavio je da će Općina Vareš i dalje subvencionirati karte socijalnim slučajevima i da stoji na raspolaganju građanima koji imaju potrebu za odlaskom u Kantonalnu bolnicu Zenica, a nisu u mogućnosti to realizovati redovnim linijama.

adresa: Zvijezda 34, 71330Vareš
identifikacijski broj: 4218285300002
depozitni račun Unicredit banka:
3380002210017420

tel.: 00387 32 848 100;
fax: 00387 32 848 150;
web: www.vares.info
e-mail: vares@bih.net.ba

(Izjašnjavanje vijećnika o dobivenom odgovoru)

Igor Hinger

„Moje pitanje je bilo upućeno Policijskoj stanici Vareš, na jedan dio pitanja sam dobio odgovor ali na dio koji se odnosi na broj izrečenih prekršajnih kazni za prljava vozila, na taj dio nisam dobio odgovor. Pa bih molio da mi se odgovori.“

Dario Dodik

„Moje vijećničko pitanje na prethodnoj sjednici bilo je da mi se dostavi informacija o broj uposlenih u periodu od 01.12. do izbora novog Općinskog načelnika. Dobio sam odgovor da nije bilo novih zapošljavanja nego da je bilo produženje Ugovora o radu. Tražim da nam se dostave svi Ugovori koji su sačinjeni na određeno ili neka postavljena koja su se desila u navedenom periodu.“

Vežano za moju podnesenu Inicijativu na 13. sjednici OV „*Da Općinsko vijeće donese zaključak o povlačenju suglasnosti za koncesiju za istraživanje plemenitih metala na lokalitetu Šaški do.*

Istim zaključkom da se obavijesti i Vlada ZDK da ne može samoinicijativno produžavati rokove iz već zaključenih koncesionih ugovora, te da za svako produženje mora pribaviti saglasnost Općine Vareš.“ tražim da se Vijeće izjasni da li je za to da ne bude produžen koncesioni ugovor bez prethodne saglasnosti Vijeća, tražim da se svaki put dostavi upit Vijeću da li smo mi saglasni za takva produženja. Razlog je taj što koncesionar nije ispoštovao odredbe ugovora o koncesiji, pa mu se dala mogućnost da čeka još dvije godine za početak istraživanja ili početak eksploatacije.“

(Vijećnička pitanja i Inicijative)

Dino Ahmedović

1. Moje pitanje se odnosi na Dnevni red današnje sjednice OV. Na sastanku, gdje su prisustvovali predsjedavajući OV, Kolegij OV i predsjednici MZ, donesen je Zaključak da će na svakoj narednoj sjednici kao tačka dnevnog reda biti i pitanje vezano za problematiku prisustva olova u krvi kod građana na području općine Vareš i sva ostala pitanja koja se odnose na tu problematiku. Pitanje upućeno predsjedavajućem OV i Kolegiju OV.
Nemojte odgovoriti da nije bilo materijala za traženu tačku Dnevnog reda, jer imali smo sastanak radne grupe 05.03. 2026. godine po pitanju akcionog plana na kojem smo imali prisutne goste od strane Instituta za zdravlje i sigurnost hrane koji su nam blagovremeno dostavili svoj izvještaj o kompletnoj situaciji. Na sastanku su prisustvovali i ljekari iz Kantonalne bolnice Zenica, službenici iz Federalnog zavoda za agropedologiju, kao i drugi doktori, ljekari, emeritusi. Imamo tu obavezu da javnost informišemo o trenutnoj situaciji.
2. „Da li je došao odgovor od strane JP ŠPD ZDK d.o.o. Zavidovići na slijedeći Zaključak OV: „*Traži se od JP ŠPD ZDK d.o.o. Zavidovići da HITNO Općinskom vijeću Vareš dostavi odgovor na Zahtjev Mjesne zajednice Pržići i Mjesne zajednice*

Daštansko od 14.11. 2025. godine, a što je u vezi sa Zaključkom Općinskog vijeća Vareš broj: 01-273/25 od 30.10. 2025. godine.“

Zahtjev MZ Pržići i MZ Daštansko odnosi se na sječu šume u katastarskom odjeljku Pržići br.parcele 1023/1, oznaka nekretnine Pećinov do, Pećinova strana odjel 84. gospodarska jedinica-gornja Stavnja, radilište Zvijezda.

U slučaju da odgovor nije dostavljen na navedeni Zahtjev, moje pitanje glasi: da li će doći do realizacije sječe šume na tom odjelu?“

Asmir Čizmo

3. „Pitanje upućeno predsjedavajućem OV Vareš. Da li će OV Vareš dobiti službeni Izvještaj sa posjete Bugarskoj koji je organizovala kompanija DPMetals BH d.o.o.? Koji su konkretni razlozi, odnosno šta građani mogu da očekuju od ovakve posjete navedenoj kompaniji?“

Nikola Šimić

4. „Moje pitanje se odnosi na Odluku o prekomjernom korištenju naših lokalnih cesta koje iniciram i postavljam već pet, šest puta u ovom mandatu OV. Dobio sam odgovor da će biti realizovana početkom proljeća, i nadam se da će biti na stolu na slijedećoj sjednici OV.“
5. „Neslužbena informacija iz JU Dom zdravlja Vareš je da naši građani ne mogu davati krv u KBZ–Tarnsfuzijskom centru. Razlog je prisutnost olova u krvi građana. Da li je to istina?
Zašto pacijenti nemaju uslugu od specijaliste radiologa u JU Dom zdravlja Vareš?“

Dario Dodik

6. „Zašto nismo proglasili stanje elementarne nepogode s obzirom na snijeg koji je pao? 50% našeg stanovništva je bilo bez struje, putevi su rizični za odvijanje uobičajenog saobraćaja. Ceste su bile očišćene, ali grane sa drveća su konstantno padale. Treba angažirati dosta više sredstava i mehanizacije.“

Nermin Hrvat

7. „Pitanje upućeno prema Službi za prostorno uređenje. Kada se planira izgradnja niša za komunalni otpad u MZ Ravne podružnica Zubeta? Nekoliko puta je obećano isto, međutim nikada nije došlo do realizacije.“

Inicijative

Edin Ibrišimović

1. Inicijativa za rješavanje pitanja snabdijevanja električnom energijom, upućena prema Općinskom načelniku i nadležnim Službama, sa zahtjevom da se provjeri mogućnost prespajanja elektroenergetskog voda koji snabdijeva mjesne zajednice

Dragovići i Borovica na postojeći vod koji dolazi iz Općine Kakanj, a koji je udaljen približno 1 km.

Cilj inicijative je trajno rješavanje problema snabdijevanja električnom energijom, jer su navedene mjesne zajednice ugrožene po pitanju električne energije. Slična praksa se već primjenjuje (MZ Kokošćići se napaja sa općine Breza), što znači da ne postoji prepreka za izvršenje istog. **(Inicijativa podnesena usmenim putem)**

Zdravko Barkić

2. Inicijativa za izmjenu postojećeg koncesionog ugovora za eksploataciju rude olova i cinka na području općine Vareš. Inicijativa upućena prema Ministarstvu privrede. **(Inicijativa podnesena pisanim putem)**

Dino Ahmedović

3. Inicijativa za reviziju i završetak projekta „Izgradnja društvenog doma MZ Daštansko, iz 2019. godine. Tražim od Jedinice za upravljanje lokalnim razvojem da izađu na teren u što kraćem roku, jer je došlo do ozbiljnih odstupanja od samog projekta. **(Inicijativa podnesena usmenim putem).**

Nikola Šimić

4. Podnosim inicijativu da se provjeri mogućnost liječenja građana općine Vareš u Sarajevu.
S obzirom da više nemamo prijevoz građana za Zenicu, smatram da se treba pokušati i na ovaj način riješiti problem. Stanovnici općine Olovo se liječe u Sarajevu, ne vidim razlog zašto i mi ne bi inicirali prema istom. **(Inicijativa podnesena usmenim putem)**

Dario Dodik

5. Inicijativa da se na općinskoj stranici objave svi dosadašnji rezultati testiranja na olovo. Ovdje se ne misli na pojedinačna testiranja, nego da se prikažu referentne vrijednosti olova i na osnovu toga grupe i da se objave na službenoj stranici Općine Vareš. Građani stječu dojam da se nešto krije. **(Inicijativa podnesena usmenim putem)**

Nazif Hajrić

6. Inicijativa za postavljanje 4 klupe na šetalištu od Ljepovića do Zabrezja.

Predsjedavajući OV stavio je na raspravu Zapisnik sa 13. sjednice OV.

Nije bilo učesnika i predsjedavajući OV stavio je na izjašnjavanje Zapisnik sa 13. sjednice OV i nakon izjašnjavanja vijećnika konstatuje da je **sa 18 glasova „ZA“ usvojen Zapisnik sa 13. sjednice OV.**

Predsjedavajući OV stavio je na raspravu prijedlog dnevnog reda 14. sjednice OV koji je usaglašen na Kolegiju Općinskog vijeća.

Ibrahim Spahić pomoćnik načelnika uz pojašnjenje predložio je dopunu dnevnog reda sa tačkom „*Prijedlog Odluke o prodaji službenih motornih vozila*“ .

Ermin Musa pomoćnik načelnika uz pojašnjenje predložio je dopunu dnevnog reda sa tačkom „*Prijedlog Odluke o izmjeni Odluke o privremenom korištenju državnog zemljištajavnih površina na području općine Vareš*“.

Vijećnik Dario Dodik uz pojašnjenje predložio je dopunu dnevnog reda sa tačkom „*Informacija o trenutnom stanju vezano za povišeno olovo*“.

U daljnjoj raspravi su učestvovali: predsjedavajući OV Igor Šimić, vijećnik Dario Dodik, pomoćnik načelnika Ibrahim Spahić i sekretar OV Mersad Đido.

Zaključena je rasprava i predsjedavajući OV stavio je na izjašnjavanje prijedlog za dopunu dnevnog reda sa tačkom „*Prijedlog Odluke o prodaji službenih motornih vozila*“ i nakon izjašnjavanja vijećnika konstatuje da je sa **17 glasova „ZA“** (odsutan vijećnik Edin Ibrišimović) **usvojen prijedlog za dopunu dnevnog reda 14. sjednice OV.**

Predsjedavajući OV stavio je na izjašnjavanje prijedlog za dopunu dnevnog reda sa tačkom „*Prijedlog Odluke o izmjeni Odluke o privremenom korištenju državnog zemljištajavnih površina na području općine Vareš*“ i nakon izjašnjavanja vijećnika konstatuje da je sa **16 glasova „ZA“ i 1 „SUZDRŽANIM“ glasom** (odsutan vijećnik Edin Ibrišimović) **usvojen prijedlog za dopunu dnevnog reda 14. sjednice OV.**

Predsjedavajući OV stavio je na izjašnjavanje prijedlog za dopunu dnevnog reda sa tačkom „*Informacija o trenutnom stanju vezano za povišeno olovo*“ i nakon izjašnjavanja vijećnika konstatuje da je sa **10 glasova „ZA“, 6 glasova „PROTIV“ i 2 „SUZDRŽANA“ glasa usvojen prijedlog za dopunu dnevnog reda 14. sjednice OV.**

Predsjedavajući OV stavio je na izjašnjavanje prijedlog dnevnog reda **14. sjednice OV** sa prihvaćenim dopunama i nakon izjašnjavanja vijećnika konstatuje da je sa **16 glasova „ZA“ i 2 „SUZDRŽANA“ glasa usvojen sljedeći**

D n e v n i r e d

1. Informacija o provednim prijevremenim izborima za načelnika Općine Vareš koji su održani 15. 02. 2026. godine.
Izvjestilac: OIK
2. Informacija o radu Policijske stanice Vareš sa ocjenom bezbjednosti za 2025. godinu.
Izvjestilac: Predstavnik PS Vareš.
3. Godišnji izvještaj/izvješće o stanju duga Općine Vareš za razdoblje januar/siječanj – decembar/prosinac 2025. godine
Izvjestilac: Općinski načelnik.
4. Izvještaj/Izvješće o izvršenju Budžeta/Proračuna Općine Vareš za period 01. 01. 2025.–31. 12. 2025. godine (Pregled prihoda, primitaka i finansiranja po ekonomskim kategorijama).
Izvjestilac: Općinski načelnik.

5. Prijedlog Odluke o prodaji službenih motornih vozila.
Izjavitelj: Ibrahim spahić.
6. Prijedlog Odluke o izmjeni Odluke o privremenom korištenju državnog zemljišta-javnih površina na području općine Vareš.
Izjavitelj: Ermin Musa.
7. Informacija o dobivenim rezultatima testiranja na prisustvo olova u krvi.
8. Prijedlog Programa rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2026. godini.
Izjavitelj: Ibrahim Spahić.
9. Prijedlog Rješenja o utvrđivanju prava suvlasništva u korist Šljivić Dragice, Šljivić Bojana i Šljivić Alena iz Vareša, Pogar bb.
Izjavitelj: Ermin Musa.
10. Prijedlog Rješenja o imenovanju Komisije za odabir korisnika sredstava Budžeta Općine Vareš za 2026. godinu – Grant za neprofitne organizacije.
Izjavitelj: Mervana Hajrić.
11. Informacija o problemima u poslovanju JP Vareš-stan d.o.o. Vareš.
Izjavitelj: Predstavnici preduzeća.
12. Tekuća pitanja.

Ad. 1.

(Informacija o provedenim prijevremenim izborima za načelnika Općine Vareš koji su održani 15. 02. 2026. godine)

Izjavitelj nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV konstatuje da je **Vijeće primilo k znanju**

Informaciju o provednim prijevremenim izborima za načelnika Općine Vareš koji su održani 15. 02. 2026. godine.

Ad. 2.

(Informacija o radu Policijske stanice Vareš sa ocjenom bezbjednosti za 2025. godinu)

Komandir PS Vareš Šejla Mustačević u svom obraćanju dala je odgovor na vijećničko pitanje sa 13. sjednice vijećnika Hinger Igora vezano za prometovanje kamiona (koji iznose blato na put ili nepropisno prevoze određeni materijal) i izdavanje prekršajnih naloga. Izjavila je da će pisanim putem vijećnici dobiti odgovor ako u toku rasprave bude postavljeno pitanje.

Otvorena je rasprava u kojoj su učestvovali vijećnici: Igor Hinger, Asmir Čizmo (*postavio je pitanja da li je došlo do porasta prekršaja „uživanje opojne droge na javnom mjestu“ u odnosu na raniji period i koji su uporedni pokazatelji iz ranijih godina kad su u pitanju „krivična djela protiv braka, porodice i mladeži, nasilje u porodici i sl.“*), Semir Memić (*postavio je pitanje da li se osobe koje su imale zabranu prilaska zbog nasilja nakon isteka iste kontrolišu*), Zdenko Franjić (*uz pojašnjenje postavio je pitanje da li je PS Vareš uputila dopis nadležnom ministarstvu da se na dionici regionalne ceste R444 Ivančevo-Vijaka postavi zaštitna ograda i saobraćani znak -crna rupa- dio puta na kome je prošle godine desila se saobraćajna nezgoda sa smrtnim ishodom dvoje sugrađana, sugerisao je na potrebu postavljanja zaštitnih ograda na stepeništu Nikovac i mostu kod OŠ Vareš i mostu preko puta „Centra“*), Edin Ibrišimović (*uz pojašnjenje sugerisao je da PS Vareš vrši pojačanu kontrolu motornih vozila koja prometuju putem preko Smreke*) i Šaban Ibrišimović (*uz pojašnjenje postavio je pitanje u kojoj je fazi realizacija postavljanja video nadzora u gradu*).

Zaključena je rasprava i predsjedavajući OV konstatuje da je **Vijeće primilo k znanju**

Informaciju o radu Policijske stanice Vareš sa ocjenom bezbjednosti za 2025. godinu.

Ad. 3.

(Godišnji izvještaj/izvješće o stanju duga Općine Vareš za razdoblje januar/siječanj – decembar/prosinac 2025. godine)

Komisija za privredu, finansije i trezor na 6. sjednici održanoj 31.03. 2026. godine jednoglasno je donijela sljedeći Zaključak:

- Komisija prihvata Godišnji izvještaj/izvješće o stanju duga Općine Vareš za razdoblje januar/siječanj – decembar/prosinac 2025. godine i isti upućuje Vijeću na razmatranje.

Šef Odsjeka za finansije Stela Terzić dala je dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici: Zdravko Barkić (*postavio je pitanje zašto u Izvještaju nije uvrštena pozajmica iz ranijeg perioda (300.000 KM) od DPMetals i na kojem kontu se ista vodi*), Nikola Šimić (*pohvalio je izradu Izvještaja i realizaciju vraćanja kredita*) i Stela Terzić (*dala je odgovor vijećniku Barkić Zdravku da su sredstva od DPMetals uplaćena kao avans za neke buduće nastale štete za puteve koje su radili, a ista su knjižena na „namjenski razgraničene prihode“*).

Nije više bilo učesnika u raspravi i predsjedavajući OV stavio je na izjašnjavanje Godišnji izvještaj/izvješće o stanju duga Općine Vareš za razdoblje januar/siječanj – decembar/prosinac 2025. godine.

Nakon izjašnjavanja vijećnika predsjedavajući OV konstatuje da je **sa 18 glasova “ZA” usvojen**

Godišnji izvještaj/izvješće o stanju duga Općine Vareš za razdoblje januar/siječanj – decembar/prosinac 2025. godine.

Ad.4.

(Izvještaj/Izvešće o izvršenju Budžeta/Proračuna Općine Vareš za period 01. 01. 2025.–31. 12. 2025. godine Pregled prihoda, primitaka i finansiranja po ekonomskim kategorijama)

Komisija za privredu, finansije i trezor na 6. sjednici održanoj 31.03. 2026. godine donijela je sljedeće Zaključke:

- Komisija prihvata Izvještaj/Izvešće o izvršenju Budžeta/Proračuna Općine Vareš za period 01. 01. 2025.–31. 12. 2025. godine (Pregled prihoda, primitaka i finansiranja po ekonomskim kategorijama) – Zaključak donesen sa 3 glasa „ZA“ i 1 „SUZDRŽANIM“ glasom.
- Komisija daje preporuku Općinskom načelniku da novčana sredstva koja su planirana Budžetom Općine Vareš za 2026. godinu koristi u skladu sa Odlukom o izvršenju Budžeta. – Zaključak jednoglasno donesen.

Šef Odsjeka za finansije Stela Terzić dala je dodatno pojašnjenje za ovu tačku dnevnog reda.

Otvorena je raspravu kojoj su učestvovali vijećnici: Zdravko Barkić (*uz pojašnjenje izjavio je da neće podržati ovu tačku dnevnog reda, postavio je pitanje pomoćniku načelnika koji je jedan period prošle godine imao ovlaštenje da mijenja Općinskog načelnika „zašto su probijene određene planirane pozicije npr. grant za mjesne zajednice, transfer za JU Centar za kulturu i edukaciju Vareš i iz kojih transfera su sredstva obezbjeđena“*) i Dario Dodik (*skrenuo je pažnju na mali utrošak sredstava u zavisnosti koliko je sredstava planirano za održavanje gradske čistoće*).

Zaključena je rasprava i predsjedavajući OV stavio je na izjašnjenje Izvještaj/Izvešće o izvršenju Budžeta/Proračuna Općine Vareš za period 01. 01. 2025.–31. 12. 2025. godine (Pregled prihoda, primitaka i finansiranja po ekonomskim kategorijama).

Nakon izjašnjavanja vijećnika predsjedavajući OV konstatuje da je **sa 13 glasova „ZA“, 3 glasa „PROTIV“ i 2 „SUZDRŽANA“ glasa usvojen**

Izveštaj/Izvešće o izvršenju Budžeta/Proračuna Općine Vareš za period 01. 01. 2025.–31. 12. 2025. godine (Pregled prihoda, primitaka i finansiranja po ekonomskim kategorijama).

Predsjedavajući OV dao je pauzu u trajanju 20 minuta.
Nastavljeno je sa radom sjednice.

Ad.5.

(Prijedlog Odluke o prodaji službenih motornih vozila)

Komisija za statutarna pitanja i propise na 12. sjednici održanoj 01.04. 2026. godine jednoglasno je donijela sjedeći Zaključak:

- Komisija nema primjedbi na Prijedlog Odluke o prodaji službenih motornih vozila te je upućuje Vijeću na razmatranje.

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Prijedlog Odluke o prodaji službenih motornih vozila.

Nakon izjašnjavanja vijećnika predsjedavajući OV konstatuje da je sa 18 glasova „ZA“ usvojena

Odluka o prodaji službenih motornih vozila.

Ad.6.

(Prijedlog Odluke o izmjeni Odluke o privremenom korištenju državnog zemljišta-javnih površina na području općine Vareš)

Izvjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici: Dario Dodik (*zahvalio se predlagачu na prihvaćenim primjedbama za smanjenje naknade za postavljanje ljetnih bašti, klupa i žardinjera za cvijeće, uz pojašnjenje predložio je da naknada za korištenje državnog zemljišta poveća se maksimalno za 50% a ne za 100% kako je to navedeno u Prijedlogu Odluke, te da postavljanje žardinjera za cvijeće bude besplatno uz prethodnu suglasnost komunalno-građevinskog inspektora*), Igor Hinger (*predložio je da održavanje kulturnih, zabavnih i sportskih manifestacija ukoliko nisu komercionalnog karaktera bude oslobođeno plaćanja naknade-član 29.*), općinski načelnik Malik Rizvanović (*uz pojašnjenje izjavio je da je visina naknade za postavljanje ljetnih bašti ispred ugostiteljskih objekata koja je bila navedena u Prijedlogu Odluke na prošloj sjednici OV a na osnovu iznesenih prijedloga vijećnika smanjena za 50%, smanjena je i naknada za postavljanje klupa i žardinjera*), Dario Dodik (*replika*) i predsjedavajući OV Igor Šimić (*sugerisao je da sredstva prikupljena od naknade za korištenje građevinskog zemljišta budu utrošena u izgradnju novih garaža ili parking mjesta*).

Zaključena je rasprava i predsjedavajući OV stavio je na izjašnjavanje Prijedlog Odluke o izmjeni Odluke o privremenom korištenju državnog zemljišta-javnih površina na području općine Vareš.

Nakon izjašnjavanja vijećnika predsjedavajući OV konstatuje da je sa 16 glasova “ZA”, 1 glasom „PROTIV“ i 1 „SUZDRŽANIM“ glasom usvojena

Odluka o izmjeni Odluke o privremenom korištenju državnog zemljišta-javnih površina na području općine Vareš.

Ad.7.

(Informacija o dobivenim rezultatima testiranja na prisustvo olova u krvi)

Otvorena je rasprava u kojoj je učestvovali vijećnici: Dino Ahmedović (*uz pojašnjenje iznio je mišljenje da treba uraditi kvalitetnu pripremu za narednu sjednicu OV i vijećnicima dostaviti materijal sa kompletnim rezultatima svih provedenih analiza kako bi se mogla voditi objektivna diskusija*), Semir Memić (*uz pojašnjenje upoznao je prisutne da je dobio informaciju od Centra za transfuziologiju Zenica da građani sa područja općine Vareš ne mogu dobrovoljno dati krv*), Dino Ahmedović (*replika*), Asmir Čizmo (*ispred Kluba vijećnika NES predložio je da se ova tačka povuče sa dnevnog reda s obzirom da za istu nema*

materijala i da vijećnici vode raspravu o ovoj tematici pod tačkom „Tekuća pitanja“), Dario Dodik (podsjetio je prisutne da je donesen Zaključak da će na svakoj sjednici OV biti ova tačka dnevnog reda, pošto na današnjoj sjednici iz opravdanih razloga nije prisutan sanitarni inspektor iznio je mišljenje da neko iz organa uprave Općine Vareš treba izvijestiti javnost i vijećnike o proteklim dešavanjima i aktivnostima nadležnih u vezi stanja sa prisustvom olova), Asmir Čizmo (uz pojašnjenje predložio je da Vijeće donese Zaključak kojim se pozivaju institucije BiH-Tužilaštvo da podnesu krivične prijave protiv svih odgovornih i da se utvrdi odgovornost da li je u Varešu ima trovanja olovom ili ga nema i ko je širio tu informaciju i kako), Dino Ahmedović (replika), Nermin Hrvat (uz pojašnjenje iznio je stav Kluba vijećnika SDA da se ova tačka povuče sa dnevnog reda dok vijećnici ne dobiju materijal o kome će diskutovati), pomoćnik načelnika Ibrahim Spahić (u svom obraćanju predložio je da na narednoj sjednici OV bude tačka dnevnog reda za koju će vijećnicima biti dostavljeni svi rezultati Akcionog plana sa rezultatima olova u krvi i svim ostalim izvještajima), Dario Dodik (uz pojašnjenje izjavio je da povlači prijedlog za ovu tačku dnevnog reda), pomoćnik načelnika Ibrahim Spahić (replika) i sekretar OV Mersad Đido (uz pojašnjenje predložio je da se po ovoj tački dnevnog reda odgodi daljnja rasprava i izjašnjavanje a da se za narednu sjednicu OV pripremi i dostavi cjelovita informacija, te da se prijedlog vijećnika Čizmo Asmira za donošenje zaključka stavi na raspravu i izjašnjavanje).

Za riječ se javio vijećnik Dario Dodik koji je tražio dodatno pojašnjenje od vijećnika Čizmo Asmira u vezi predloženog zaključka. Vijećnik Asmir Čizmo dao je dodatno pojašnjenje i izjavio je da je jedini cilj predloženog zaključka da se razjasne činjenice.

Predsjedavajući OV stavio je na izjašnjavanje sljedeći

Zaključak:

- 1. Općinsko vijeće Vareš traži od Kantonalnog tužilaštva Zeničko-dobojskog kantona i Federalnog tužilaštva Federacije Bosne i Hercegovine da utvrde odgovornost nadležnih institucija o postupanju/nepostupanju istih, a u vezi situacije koja je nastala zbog prisustva olova u krvi kod građana općine Vareš.**
- 2. Općinsko vijeće Vareš traži od Kantonalnog tužilaštva Zeničko-dobojskog kantona i Federalnog tužilaštva Federacije Bosne i Hercegovine provjeru postupanja NN osoba zbog širenja informacija/dezinformacija o prisustvu olova u krvi kod građana općine Vareš.**
- 3. Navedeno u tačkama 1. i 2. ovog Zaključka se traži s ciljem razjašnjenja činjenica i sprečavanja daljnjih negativnih efekata po građane općine Vareš, privrednike i kompletnu lokalnu zajednicu.**
- 4. Zaključak stupa na snagu danom donošenja.**

Nakon izjašnjavanja vijećnika, predsjedavajući OV konstatuje da je sa **15 glasova „ZA“** i **3 „SUZDRŽANA“** glasa usvojen predloženi Zaključak.

Predsjedavajući OV konstatuje da je daljnja rasprava po ovoj tački odgođena za narednu sjednicu OV za koju će Vijeću biti pripremljena i dostavljena cjelovita informacija.

Ad. 8.

(Prijedlog Programa rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2026. godini)

Izvjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici Zdravko Barkić i Nikola Šimić i pomoćnik načelnika Ibrahim Spahić koji je dao pojašnjenje vijećniku Barkić Zdravku da se planirana sredstva prikupljaju od poreza za zaštitu od prirodnih i drugih nesreća koji se izdvaja od ličnih primanja osoba koje imaju prebivalište na općini Vareš. Dao je odgovor vijećniku Nikoli Šimić da su u javnim nabavkama za tekuću godinu planirana sredstva za sanaciju potpornog zida na groblju Stogić u iznosu od oko 27.000 KM i da je sa Direkcijom za ceste ZDK dogovoreno da će radovi na sanaciji potpornog zida izvršiti se u aprilu ili maju mjesecu. U međuvremenu će se uraditi projekat za potpunu rekonstrukciju potpornog zida i to će biti planirano u kantonu. Upoznao je prisutne u koje svrhe su utrošena određena sredstva ostvarena po osnovu posebne naknade za zaštitu od prirodnih i drugih nesreća.

Zaključena je rasprava i predsjedavajući OV stavio je na izjašnjavanje Prijedlog Programa rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2026. godini.

Nakon izjašnjavanja vijećnika predsjedavajući OV konstatuje da je sa **18 glasova „ZA“ usvojen**

Program rasporeda i utroška planiranih sredstava ostvarenih po osnovu posebne naknade za zaštitu od prirodnih i drugih nesreća namijenjenih za provođenje preventivnih mjera u 2026. godini.

Ad. 9.

(Prijedlog Rješenja o utvrđivanju prava suvlasništva u korist Šljivić Dragice, Šljivić Bojana i Šljivić Alena iz Vareša, Pogar bb)

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Prijedlog Rješenja o utvrđivanju prava suvlasništva u korist Šljivić Dragice, Šljivić Bojana i Šljivić Alena iz Vareša, Pogar bb.

Nakon izjašnjavanja vijećnika predsjedavajući OV konstatuje da je sa **18 glasova „ZA“ usvojeno**

Rješenje o utvrđivanju prava suvlasništva u korist Šljivić Dragice, Šljivić Bojana i Šljivić Alena iz Vareša, Pogar bb.

Ad. 10.

(Prijedlog Rješenja o imenovanju Komisije za odabir korisnika sredstava Budžeta Općine Vareš za 2026. godinu – Grant za neprofitne organizacije)

Izvjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici: Zdravko Barkić (*postavio je pitanje da li su utvrđeni kriteriji za dodjelu sredstava i da li ima pravilnik o kriterijima, ako ima da se sa istim upozna Vijeće, skrenuo je pažnju o nacionalnoj zastupljenosti u ovakvim komisijama*), Asmir Čizmo (*replika*), Zdravko Barkić (*replika*), općinski načelnik Malik Rizvanović (*izjavio je da prihvata sugestiju vijećnika Barkić Zdravka i predložio da se izvrši izmjena člana komisije i da umjesto Fatić Mirze član bude Stela Terzić*), pomoćnik načelnika Mervana Hajrić (*u svom obraćanju upozнала je prisutne da je 27.02. 2014. godine Vijeće usvojilo Odluku o kriterijima, načinu i postupku raspodjele sredstava iz granta za neprofitne organizacije, u članu 4. iste Odluke definisano je da Komisija broji tri člana -jedan član iz Službe za privredu, finansije i trezor, jedan član iz Službe za društvene djelatnosti i jedan član iz reda udruženja građana bez navođenja nacionalne zastupljenosti, uz pojašnjenje je predložila da se izvrši izmjena Odluke*) i Zdravko Barkić (*replika*).

Predsjedavajući OV stavio je na izjašnjavanje prijedlog općinskog načelnika da se u Prijedlogu Rješenja u članu 1. umjesto člana Komisije Mirze Fatića imenuje Stela Terzić.

Nakon izjašnjavanja vijećnika predsjedavajući konstatuje da je sa **18 glasova „ZA“ usvojen prijedlog.**

Zaključena je rasprava i predsjedavajući OV stavio je na izjašnjavanje Prijedlog Rješenja o imenovanju Komisije za odabir korisnika sredstava Budžeta Općine Vareš za 2026. godinu – Grant za neprofitne organizacije sa prihvaćenom izmjenom.

Nakon izjašnjavanja vijećnika predsjedavajući OV konstatuje da je sa **18 glasova „ZA“ usvojeno**

Rješenje o imenovanju Komisije za odabir korisnika sredstava Budžeta Općine Vareš za 2026. godinu – Grant za neprofitne organizacije.

Ad. 11.

(Informacija o problemima u poslovanju JP Vareš-stan d.o.o. Vareš)

Direktor JP „Vareš-stan“ d.o.o. Vareš Ivan Miletović u svom obraćanju upoznao je Vijeće o teškoj finansijskoj situaciji preduzeća koju je prezentovao i na sastanku sa Kolegijem općinskog načelnika na kome je zatraženo da preduzeće izradi prijedlog mjera za finansijsku konsolidaciju preduzeća. Prijedlog mjera je urađen i dostavljen vijećnicima za današnju sjednicu.

Elmedina Muftić ispred uposlenika preduzeća u svom obraćanju upozнала je Vijeće o stanju stambenog fonda, poslovanju preduzeća, prihodima i obavezama kao i o problemima sa kojima se susreću u svom radu.

Predsjedavajući OV zamolio je vijećnike da se aktivno uključe u raspravu u cilju iznalaženja rješenja problema u kojima se nalazi preduzeće.

Otvorena je rasprava u kojoj su učestvovali vijećnici: Nazif Hajrić (*slaže se da se treba povećati cijena naknade za održavanje ali isto tako trebaju se povećati i usluge preduzeća*), Edin Ibrišimović (*mišljenja je da je jedino rješenje privatizacija preduzeća*), Zdravko Barkić (*uz pojašnjenje predložio je da se razmotri mogućnost da se ide na stečaj i da se formira nova firma sa određenom politikom poslovanja*), Asmir Čizmo (*predložio je da se formira stručna komisija koja će razmotriti prijedlog mjera koje su predložene od direktora, napravi kvalitetan reprogram i uporedna analiza sa drugim općinama*), Semir Memić

(pozvao je vijećnike i Kolegij OV da se donesu konkretna rješenja i zajednički stavovi), Dario Dodik (uz pojašnjenje izjavio je da je jedina opcija osim stečaja i privatizacije pripajanje preduzeća JKP d.o.o. Vareš), Zdravko Barkić (replika), Igor Hinger (iznio je mišljenje o broju zaposlenih u preduzeću, potrebi preduzeća u nalaženja komercijalnih poslova i sl.), Nermin Hrvat (slaže se da treba oformiti stručnu komisiju koja će raditi na iznalaženju rješenja stanja u kome se nalazi preduzeće), općinski načelnik Malik Rizvanović (mišljenja je da je potrebno iznaći adekvatan način finansiranja i način kako da preduzeće opstane prvenstveno zbog građana, tražiti komercijalne poslove, uz pojašnjenje izjavio je da nije za spajanje preduzeća sa JKP) i Elmedina Muftić (upoznala je prisutne sa provedenim zakonskim procedurama za imenovanje upravitelja i dužnost stambenih vlasnika za sklapanje Ugovora sa upraviteljem, iznijela je problem naplate dugovanja vlasnika stanova koji ne žive na području BiH kao i onih koji imaju dugovanja a izvrše prodaju stanova).

Predsjedavajući OV dao je pauzu u trajanju 5 minuta kako bi članovi Kolegija OV/predsjednici stranaka zajednički zauzeli određene stavove.

Nastavljeno je sa radom sjednice.

Predsjedavajući OV pozvao je sekretara OV da upozna Vijeće o zajedničkom zaključku koji je usaglasio Kolegij OV.

Sekretar OV upoznao je Vijeće sa tekstom zaključka koji glasi:

Zaključak:

- 1. Općinsko vijeće Vareš razmotrilo je Informaciju o preblemimima u poslovanju JP „Vareš-stan“ d.o.o. Vareš i istu prima k znanju.**
- 2. Općinsko vijeće Vareš traži od Skupštine ZDK da pristupi izmjenama i dopuni Zakona o upravljanju zajedničkim dijelovima zgrade i uređajima u stambenim zgradama u dijelu koji se odnosi na minimalnu cijenu upravljanja u smislu da se ista poveća, te da se u Zakonu izvrši dopuna da se ne može izvršiti prometovanje nekretnine dok se ne dostave dokazi o izmirenim obavezama prema upravitelju, javnim preduzećima i Općini.**
- 3. Zadužuje se Općinski načelnik da formira Stručnu radnu grupu sastavljenu od pet (5) članova i to:**
 - predstavnik Općine (1 član),
 - predstavnik JP „Vareš-stan“ d.o.o. Vareš (1 član),
 - predstavnik Općinskog vijeća Vareš (1 član) i
 - predstavnik korisnika usluga (2 člana).

Zadatak Stručne radne grupe je da u roku od 30 dana od dana imenovanja uradi analizu postojećeg stanja i predloži mjere za ozdravljenje preduzeća.

- 4. Ovaj Zaključak stupa na snagu danom donošenja.**

Predsjedavajući OV otvorio je raspravu po predloženom Zaključku.

Nije bilo učesnika u raspravi i predsjedavajući OV stavio je na izjašnjavaње predloženi Zaključak i nakon izjašnjavaња vijećnika konstatuje da je sa **15 glasova „ZA“** (odsutni vijećnici: Dževad Mahmutović, Asim Balta i Dino Ahmedović) **usvojen predloženi Zaključak.**

Ad.12.
(Tekuća pitanja)

Predsjedavajući OV upoznao je Vijeće sa tekućom poštom i to:

1. Na osnovu podnesene Inicijative koju je pisanim putem podnio vijećnik Zdravko Barkić u vezi izmjene postojećeg koncesionog ugovora za eksploataciju rude olova i cinka na području općine Vareš stavio je na raspravu sljedeći

Zaključak

1. **Općinsko vijeće Vareš podržava inicijativu za reviziju i povećanje koncesionih naknada za eksploataciju ruda olova, cinka, barita i pratećih plemenitih metala na području općine Vareš te nalaže Općinskom načelniku da uputi zvaničan dopis Ministarstvu privrede Zeničko-dobojskog kantona sa slijedećim zahtjevima:**
 - Usklađivanje naknade sa tržišnom vrijednošću i obimom proizvodnje. Zahtjeva se od nadležnog Ministarstva da pokrene proceduru izmjene koncesionog ugovora sa investitorom (sadašnji DPMetals BH d.o.o. Vareš) u cilju povećanja koncesione naknade na način kakva je uobičajena praksa u svijetu.
 - Neophodno je da iznos naknade odražava trenutni ekonomski značaj resursa i osigura pravedniju raspodjelu prihoda u korist lokalne zajednice, budući da je projekat prešao iz faze istraživanja u punu fazu eksploatacije i prerade.
2. **U cilju realizacije tačke 1. ovog Zaključka, Općinsko vijeće Vareš zahtijeva:**
 - Od Općinskog načelnika da u što kraćem roku inicira i organizuje zajednički radni sastanak s predstavnicima Ministarstva privrede ZDK, na kojem će se usaglasati daljnji koraci i dinamika izmjene koncesionog ugovora.
 - Direktno učešće Općine Vareš u procesu, na način da se u radnu grupu ili pregovarački tim za izradu novih odredbi o koncesionoj naknadi, kao i svih vezanih akata, obavezno uključi ovlašteni predstavnik Općine Vareš (stručno lice iz nadležne službe ili imenovani član Vijeća), s ciljem zaštite interesa lokalne zajednice.
3. **Zadužuje se stručna služba Općinskog vijeća i Kabinet Općinskog načelnika da prate realizaciju ovog Zaključka i o ishodu komunikacije sa Ministarstvom privrede ZDK izvijeste Vijeće na prvoj narednoj sjednici.**
4. **Sastavni dio ovog Zaključka je Inicijativa sa načinom obračuna koncesione naknade.**
5. **Zaključak stupa na snagu danom donošenja.**

Nakon rasprave i izjašnjavanja vijećnika po Zaključku predsjedavajući OV konstatuje da je sa **15 glasova „ZA“** (odsutni vijećnici: Dževad Mahmutović, Asim Balta i Dino Ahmedović) **usvojen predloženi Zaključak:**

Vijeće je sa **15 glasova „ZA“** (odsutni vijećnici: Dževad Mahmutović, Asim Balta i Dino Ahmedović) **usvojilo i**

Zaključak:

- **Zdravko Barkić, vijećnik Općinskog vijeća Vareš imenuje se za člana radne grupe ili pregovaračkog tima u toku izrade novih odredbi o koncesionoj naknadi kao i svih vezanih akata koji se tiču naknade.**
- 2. Urgencija za ponovno razmatranje Rješenja o utvrđivanju obaveze plaćanja za osiguranje sredstava općinskog fonda za vatrogastvo, broj: 02/4-40-2-95/26 od 12.01. 2026. godine izdatog od Općine Vareš - Služba za civilnu zaštitu. Urgencija je dostavljena od SeanTech Bosnia d.o.o. Vareš 11.03. 2026. godine.

Otvorena je rasprava u kojoj su učestvovali: vijećnici Dario Dodik i Zdenko Franjić, predsjedavajući OV Igor Šimić, pomoćnik načelnika za Civilnu zaštitu Ibrahim Spahić i općinski načelnik Malik Rizvanović.

Predsjedavajući OV stavio je na izjašnjavanje prijedlog Zaključka predložen od vijećnika Dodik Daria kojim traži da se Odluka preispita i u slučaju usvajanja Zaključka da se urade izmjene Odluke.

Zaključak:

- **Vijeće traži od predlagača da preispita Odluku o utvrđivanju visine naknade za osiguranje sredstava općinskog fonda za vatrogastvo, broj: 01-299/25 od 27.11. 2025. godine.**

Nakon izjašnjavanja vijećnika predsjedavajući konstatuje da **sa 1 glasom „ZA“, 11 glasova „PROTIV“ i 3 „SUZDRŽANA“ glasa** (odsutni vijećnici: Dževad Mahmutović, Asim Balta i Dino Ahmedović) **predloženi Zaključak nije usvojen.**

- 3. Žalba na rad/nerad firme JKP d.o.o. Vareš prilikom zimskog održavanja lokalnih puteva, broj: 08/04/26 od 01.04. 2026. godine dostavljena od predsjednika MZ Dragovići.

Otvorena je rasprava u kojoj su učestvovali vijećnici: Šaban Ibrišimović, Edin Ibrišimović, Dario Dodik, Semir Memić, predsjedavajući OV Igor Šimić i općinski načelnik Malik Rizvanović.

Nakon rasprave predsjedavajući OV sugerisao je da **Općinski načelnik po ovom dopisu i navedenoj problematici u istom, komunicira sa direktorom JKP d.o.o. Vareš i Vijeće izvijesti o očitovanju direktora.**

- 4. Molba za rješavanje problema odlaganja otpada dostavljena 17.03. 2026. godine od Dodik Zorana i Andree.
Predsjedavajući OV upoznao je prisutne da je po ovom dopisu Kolegij OV na 14. sjednici održanoj 23.03. 2026. godine zauzeo stav da se Molba prosljedi nadležnoj Službi na očitovanje. Očitovanje još nije dostavljeno i predsjedavajući OV sugerisao je da nadležna Služba u što kraćem roku dostavi Očitovanje sa zaključkom kako riješiti problem prezentovan u Molbi.

Otvorena je rasprava u kojoj su učestvovali vijećnici: Zdravko Barkić, Asmir Čizmo, Dario Dodik, predsjedavajući OV Igor Šimić, općinski načelnik Malik Rizvanović i pomoćnik načelnika Ermin Musa.

Općinski načelnik Malik Rizvanović i pomoćnik načelnika Ermin Musa u svom obraćanju izjavili su da će Općina Vareš poduzeti sve potrebne radnje da se navedeni problem riješi u što kraćem roku.

5. Vijećnik Igor Hinger podsjetio je prisutne da je nedavno Načelnik potpisao Ugovor sa Vijećem mladih FBiH o formiranju Vijeća mladih u Varešu. Pozvao je sve mlade i općinske službe da daju svoj doprinos da Vijeće mladih zaživi u pravom smislu.
6. Vijećnik Asmir Čizmo uz pojašnjenje predložio je sljedeći

Zaključak:

- **Općinsko vijeće Vareš traži od JU Kantonalna bolnica Zenica – Transfuzijski centar da Općinskom vijeću Vareš dostavi Objašnjenje o razlozima onemogućavanja građanima sa područja općine Vareš da dobrovoljno daruju krv.**

Predsjedavajući OV stavio je na izjašnjavanje predloženi Zaključak i nakon izjašnjavanja vijećnika konstatuje da je sa **13 glasova „ZA“** (odsutni vijećnici: Dževad Mahmutović, Asim Balta, Dino Ahmedović, Nermin Hrvat i Šaban Ibrišimović) **usvojen predloženi Zaključak.**

7. Predsjedavajući OV Igor Šimić informisao je javnost o pozivu kompanije DP Metals i posjeti Općinskog vijeća Vareš i predsjednika/predstavnika mjesnih zajednica Pržići, Mir, Daštansko i Borovica rudniku u Bugarskoj-Čelopek. Osnovni cilj putovanja bio je da se vijećnici i predsjednici/predstavnici mjesnih zajednica upoznaju sa gradom, kompanijom i stvarima koje kompanija radi u tom gradu i koje benefite grad ima od rudarenja kompanije.

U raspravi su učestvovali vijećnici: Edin Ibrišimović, Zdravko Barkić i Asmir Čizmo.

Predsjedavajući OV u ime Vijeća i u svoje lično ime uputio je čestitke građanima katoličke i pravoslavne vjeroispovijedi za predstojeće blagdane Uskrs i Vaskrs.

Sjednica je završena u 20.18 sati.

Sastavni dio ovog Zapisnika je audio zapis 14. sjednice OV Vareš.

**SEKRETAR
OPĆINSKOG VIJEĆA**

Mersad Đido



**PREDSJEDAVAJUĆI
OPĆINSKOG VIJEĆA**

Igor Šimić